

# বিকল্প প্রত্যয়নামা

আনন্দময় এবং সৃজনশীল জীবনের দর্শন

মূলঃ পল কার্জ

অনুবাদঃ জাহেদ আহমদ  
worldcitizen73@yahoo.com

## দুই: নতুন আলোকে সংশয়বাদ

বিজ্ঞানের ক্ষেত্রে যেসব বিশ্লেষাত্মক অনুসন্ধান পদ্ধতিসমূহ (methods of critical inquiry) অত্যন্ত কার্যকর প্রমাণিত হয়েছে, মানবকল্যাণ সংশ্লিষ্ট সমস্ত ক্ষেত্রেই সেগুলির প্রয়োগ হওয়া উচিত। যে কোন বিশ্বাসকে অনুকল্প (hypotheses) হিসেবে দেখা উচিত যাকে প্রমাণ, সংগতিপূর্ণ যুক্তি এবং পরীক্ষামূলক ফলাফলের ভিত্তিতে মূল্যায়ন করা সম্ভব। জ্ঞানের যে কোন দাবীর মধ্যে অনুসন্ধানের আলোকে পর্যালোচনা করার পথ খোলা থাকা উচিত। তাতে জ্ঞানের উত্তরোত্তর সমৃদ্ধি ঘটে থাকে।

মানব জ্ঞানের উন্মেষের জন্য সংশয়ী অনুসন্ধান (skeptical inquiry) জরুরী। এটি বিজ্ঞান, দর্শন এবং শিক্ষার ঐতিহাসিক ধারার প্রতিনিধিত্ব করে। অনুসন্ধান (inquiry) কথাটি দ্বারা আমরা সংশয়ী অনুসন্ধানকে ক্লাসিক্যাল সংশয়বাদ (classical skepticism) থেকে আলাদা করতে পারি, যা নেতিবাচক, এমনকি কোন কিছুতেই আশা রাখতে অপারগ ছিল। আলোচ্য ধারার সংশয়বাদই নব্য সংশয়বাদ (new skepticism), কারণ এটি ইতিবাচক এবং গঠন মূলক; এর নীতিসমূহ প্রকৃতি এবং মানবআচরণ সম্পর্কে জ্ঞানের বিকাশের জন্য জরুরী। অধিকন্তু, এর পদ্ধতিসমূহ নৈতিক, রাজনৈতিক এবং সামাজিক সমস্যার সমাধান কল্পে প্রাসংগিক।

উপরের বক্তব্যের আলোকে নিম্নলিখিত নীতিসমূহ সংশয়ী অনুসন্ধানীদের জন্য দিক নির্দেশনার ভূমিকা পালন করেঃ

- নির্ভরযোগ্য মানবজ্ঞান আবিষ্কারের সম্ভাবনাতে আমরা আস্থাশীল। মানব মেধার ইতিবাচক ক্ষমতায় আমরা বিশ্বাস স্থাপন করি। আমরা এই মর্মে আস্থাশীল, বৈজ্ঞানিক অনুসন্ধানের পদ্ধতিসমূহ জ্ঞানের বিকাশ ও বৃদ্ধি ঘটাতে সাহায্য করবে এবং সেগুলি মানবজাতির কল্যাণে প্রয়োগ করা যাবে।
- আমরা মনে করি, সংশয়বাদ বৈজ্ঞানিক অনুসন্ধানের অন্যতম উপাদান এবং মানব প্রচেষ্টার সকল ক্ষেত্র যেমন- বিজ্ঞান, প্রাত্যহিক জীবন, আইন, ধর্ম এবং আতিপ্রাকৃতিক বিষয়াদি (paranatural), অর্থনীতি, রাজনীতি, নীতিশাস্ত্র, সমাজে এটি এবং যুক্তির মাপকাঠির প্রয়োগ ঘটা উচিত।

- আমরা বিশ্বাস করি, পৃথিবী সম্পর্কে যেকোন যথার্থ অনুসন্ধানের ক্ষেত্রে বিশ্লেষাত্মক চিন্তা-ভাবনা (critical thinking) অত্যন্ত জরুরী এবং এর সাহায্যে বিভিন্ন সমস্যার সমাধান, শত্রুতা দূরীকরণ, ঘৃণা-বিদ্বেষ হ্রাস এবং মতপার্থক্যের মীমাংসা করা সম্ভব।
- আমরা অস্পষ্টতার বদলে স্বচ্ছতা, বিভ্রান্তির স্থলে সহজবোধ্যতা, দুর্বোধ্যতার স্থলে স্পষ্ট এবং সংজ্ঞায়িত ব্যাখ্যাতে বিশ্বাস করি।
- পূর্ব-অনুসন্ধান ব্যতীত জ্ঞানের কোন দাবীকে আমরা প্রত্যাখান করি না। কিন্তু আমরা জোর দিয়ে বলি, দাবীটি যেন এরকম ধারার হয় যা পরীক্ষা দ্বারা যাচাই করা যায় এবং দাবীর স্বপক্ষে প্রমাণ সরবরাহ করার দায়িত্ব প্রাথমিকভাবে দাবী উত্থাপনকারীর উপরেই বর্তায়।
- আমরা অনুমানের স্থলে তথ্যে, সস্তা জনশ্রুতির স্থলে পরীক্ষামূলক প্রমাণে এবং বিশ্বাস বা অনুমানের স্থলে যৌক্তিক সিদ্ধান্তের দাবী জানাই।
- চূড়ান্ত কোন মতবাদ বা ধর্মীয় বিশ্বাসে আমরা আস্থাশীল নই, সেটা পাথরে খোদাই করে কিংবা অন্য যে কোনভাবেই প্রতিষ্ঠিত হোক না কেন।
- প্রাচীন ভয়ভীতি নির্ভর কিংবা পরবর্তীকালের 'মোহমুক্তি,' 'পরজাগতিক মুক্তি' (salvation) সংক্রান্ত পৌরাণিক কাহিনী ও মতবাদ- যে গুলির আদৌ দৃঢ় ও পরীক্ষামূলক কোন ভিত্তি নেই—আমরা সেগুলিকে প্রত্যাখান করি। অনুসন্ধান ও যুক্তিকে আমরা যে কোন প্রকার কর্তৃত্ব ও ঐতিহ্যের উপরে স্থান দেই।
- বিজ্ঞান এবং যুক্তির প্রয়োগ দ্বারা নতুন প্রযুক্তির উদ্ভাবন, মানব জাতির দুঃখ-কষ্টের লাঘব এবং সুখী ও সমৃদ্ধি হওয়ার দ্বার উন্মোচন করা সম্ভব।
- আমরা এই মর্মে প্রত্যয়ন করি যে- নীতিশাস্ত্র, মূল্যবোধ এবং সামাজিক নীতিমালার উন্নয়ন এবং পরীক্ষার ক্ষেত্রে যুক্তিনির্ভর অনুসন্ধান আমাদের সাহায্য করে মানব কল্যাণে অবদান রাখতে পারে।
- আমরা নেতিবাচক সংশয়ী, উন্মোচনকারী, চিরসন্দ্বিহান (cynics) কিংবা চিরনৈরাশ্যবাদী (nihilists) নই। আমরা মূলত কপটতা, ছলচাতুরীপূর্ণ নীতিকথা, প্রতারণা, ঠকবাজি এবং বিভ্রান্তির বিপক্ষে। সেগুলির স্থলে আমরা প্রমাণ নির্ভর পরীক্ষা এবং যুক্তিকে গুরুত্ব দেই। সংক্ষেপে আমরা বিশ্বাস করি, বিশ্লেষাত্মক অনুসন্ধান (critical inquiry) আমাদের প্রাপ্তি লক্ষ্য অর্জনের এবং আকাংখা পূরণের সর্বোত্তম পন্থা।

# শ্রিন: একটি নতুন দৃষ্টিভঙ্গি

একটি নতুন দৃষ্টিভঙ্গি বিকশিত হচ্ছে -

- যা মানব বিচরণের প্রতিটি ক্ষেত্রে মুক্ত অনুসন্ধান (free inquiry) অঙ্গীকারবদ্ধ।
- যাতে বিশ্বাস করা হয় যে, নির্ভরযোগ্য জ্ঞান অর্জন সম্ভব। এটি বিশ্বাসকে পরীক্ষামূলক ফলাফল এবং যৌক্তিক সামঞ্জস্যতার নিরিখে বিচার করে।
- এটি সহজাত (naturalistic)। প্রকৃতি সম্পর্কে জ্ঞানলাভ ও মানব সমস্যার সমাধানকল্পে এটি বিজ্ঞানের পদ্ধতিসমূহ এবং যুক্তির প্রয়োগ দেখতে আগ্রহী।
- এটি সংশয় নির্ভর। ঐশী বাণী, অতীন্দ্রিয়বাদ, অন্ধ বিশ্বাস, কর্তৃত্ব বা ঐতিহ্যসহ—যেসব দাবীর ক্ষেত্রে পর্যাপ্ত প্রমাণ নেই, সেগুলিকে এটি সংশয়ের দৃষ্টিতে দেখে।
- এটি শিক্ষা, বিশ্লেষাত্মক চিন্তার চর্চা এবং যুক্তি নির্ভর প্রচেষ্টাকে সামাজিক পরিবর্তন অর্জনের সর্বোত্তম উপায় বলে স্বীকৃতি দেয়।
- এটি সম্পূর্ণরূপে মানবধর্মী।
- পৃথিবীতে মানব সুখের অনুধাবন এবং আলিঙ্গনের ধারার উপর এটি গুরুত্ব প্রদান করে।
- সকল মানুষের জন্য কল্যাণকর- এরকম আদর্শ বাস্তবায়নের ক্ষেত্রে এটি সম্মিলিত প্রচেষ্টাতে বিশ্বাসী, যেমনঃ বিশ্বজনীন অধিকার, সার্বজনীন সুবিধা এবং মূল্যবোধ। এটি ব্যক্তির স্বতন্ত্র জীবন যাপনের অধিকারকে সহনশীলতার দৃষ্টিতে দেখে।
- এটি সৃজনশীলতা এবং আত্মোপলব্ধির গুরুত্বকে সর্বোচ্চ মর্যাদায় নিয়ে যেতে নিবেদিত।
- এটি রাষ্ট্রকে ধর্মীয় প্রতিষ্ঠানসমূহ (যেমন- চার্চ, মসজিদ, মন্দির) থেকে, রাজনীতিকে ধর্মতত্ত্ব থেকে এবং নাগরিক মূল্যবোধকে ধর্ম থেকে পৃথক রাখার পক্ষপাতী।
- এটি গণতান্ত্রিক। এটি প্রতিটি মানুষের মর্যাদা এবং সম্ভাবনাতে গুরুত্ব আরোপ করে; মানব স্বাধীনতার মাত্রার প্রসার এবং সামাজিক ন্যায়বিচার, সমতা এবং নিরপেক্ষতায় বিশ্বাসী। প্রতিটি ব্যক্তিকে উত্তম জীবন অর্জনের সুযোগ প্রদান করতে এটি প্রত্যাশী।
- অতীতমুখী সংকীর্ণ চিন্তাধারার উর্দে উঠে গ্রহগত (planetary) মূল্যবোধের ভিত্তিতে একটি বিশ্বসমাজ গড়ে তোলার ব্যাপারে এটি বদ্ধ পরিকর।
- এটি বাস্তববাদীতার নিরিখে এই অর্থে আশাবাদী যে, মানুষের সমস্যা সমাধানে মানুষের ক্ষমতাতে এটি বিশ্বাস পোষণ করে।

- এটি সদিচ্ছার চর্চায় উৎসাহী। শক্তি বা হিংস্রতার পরিবর্তে আলোচনা, সমঝোতা এবং সমস্যার শান্তিপূর্ণ সমাধানকে এটি প্রাধান্য দেয়।
- এটি উত্তম পৃথিবী বিনির্মাণের সম্ভাবনায় বিশ্বাসী।
- এটি সমর্পণ, পলায়ন বা করুণার চাইতে বাঁধা-বিপত্তি জয় করার সাহস, আত্ম-বিশ্বাসকে উৎসাহিত করে মানুষের বিশ্বাসের বাস্তবায়নে আগ্রহী।
- মানব অস্তিত্বের বিয়োগান্তক মাত্রা, হতাশা বা ব্যর্থতা নয়; বরং এটি গুরুত্ব আরোপ করে আমরা অর্জন করতে সক্ষম-এরকম শ্রেষ্ঠত্বের অনুসন্ধানকে, যা অন্য কথায়, আমাদের নিজেদের এবং অন্যসব মানুষের জন্য উৎকর্ষময়তা ও উদারতায়পূর্ণ একটি মহৎ জীবন।
- এটি মানবজ্ঞানকে জীবনের চালিকাশক্তি হিসেবে দেখতে প্রত্যাশী।

(চলবে)

নিউ ইয়র্ক

জানুয়ারী ১৭, ২০০৭